

## QUANT SI RISOLVARAE ROME A SISTEMÂ I JULIANS?

La quistion dai julians scjampâz in Italie 'e scomenze a diventâ ranzide, come dutis lis robis masse lungjs. Se dutis lis sovenzions gjavadis di sachete par merit di centenârs di Comitâz, di Sodalizis, di Istitûz e duc' i miliarz in monede o in robe smolâz dal guviâr a' fossin mitûz intune, 'e vignares fûr une sume che bastares par regalâ qualchi milion a ognidun dai rifugjâz. Invezzi i miliarz a' son lâz in nuje par mil e mil riulûz, indulà che ognidun al a cirût e al cîr di urî plui ch'al pò; si son inutilîz tes mans dai promotôrs e impiegâz dai comitâz o de burocrazie statâl; a' son lâz strassâz par vie di preferenzis, di favoritîsims e di mangjariis; e la quistion 'e je simpri in pîs e nol è stât fat quasi nuje di pusitîf e di stabil par sistemâ cheste int, in maniere che puedi vivi cence seguitâ a cirî la caritât.

Cussî i plui svelz si son metûz a puest benon e la majoranze 'e restarâ, cui sa nuje par cetant timp, une plae simpri viarte.

Si pâr mâl a fevelâ sclet sul cont di ciartis situazions, ma cui esal colpe se chestis situazions a' devèntin cronichis? Il guviâr talian, cu la stupide speranze di gjavâsi a bon presi des consequenzis di une uere piardude al à soflât sul fûc plui ch'al à podû, cun promessis e zuramenz, par che i talians da l'Istrie a' mostrassin al mont il lôr amôr di Patrie, bandonant la lôr patrie e la lôr robe pitost di sta sot il gnûf paron. Il biel "gesto retorico" al restarâ scrit a letaris d'aur su duc' i libris des scuelis talianis, dongje di chel di Balilla e di Masaniello. Ma in sostanzie al è stât nome un gran regâl al paron di là vie, un regâl che j à mitût in man sore nuje, cjasis e terens e lu à liberât di dutis lis secjadis che podeve creâj une minoranze taliane avonde fuarte, sul so teritori.

Otignût chest biel risultât, il guviâr al à, si pò dî, bandonade 'e publiche beneficenze cheste biade int, che aromai no pò siarvîj pes sôs rivendicazions teritoriâls ladis a mont. In cinc agn si son dadis di volte a Rome, pentarchiis, tetrarchiis, triarchiis e cumbinazions pulitichis d'ogni fate, e nissune no à savût risolti cun tun provediment difinitîf cheste falope grande come une mont.

Cumò i julians si lemèntin dal pôc bon cûr dai talians, e i talians - che, in grande part, a'ndî àn un goso a tirâ indenant - a' scomènzin a stufâsi di meti la man te sachete ogni altre dì. Parcè che si stufîsi ancje di un fradi di sanc, quan'che al tocje mantignîlu par agn e agn. Cui ch'al à fate la buse, che la stropi, che sares nome ore: massime pal Friûl, che di cheste bûzare al à scugnût puartâ plui di duc' il pês e la spese.